

Delegiertenversammlung CVP Kt. Zug, Nomination, 16. Juni 2015

Gschätzti Delegierti vo de CVP Kt. Zug

- Ich ha die grossi Ehr, Ihne im Uftrag vo de CVP Steihuse min (politisch) Sohn, de Andreas Husheer, als Nationalratskandidat vor z'schla.
- Aber halt! Was söll das mit em Sohn? Das cha ja gar nid stimme!
- De Andreas betont immer wieder, dass er 3 Muettere häd: sini libliche Muetter, sini Fasnachtsmuetter und sini politisch Muetter.
- Trotz drü Muettere darf er aber keinesfalls als es „Muettersöhni“ bezeichnet wärde, sondern er stah selbständig und mit beidne Bei im Läbe.
- Er isch en ächte Ur-Steihuser, ufgwachse mit zwei ältere Gschwüster in ere gut bürgerliche Familie im ene CVP-nöche-Umfäld.
- Unterdesse isch er verhäratet und stolze Vater vo eme Sohn.
- Nach de obligatorische Schuelzyt absolviert er s'KV und aschlüssend Witerbildige zum Betriebsökonom HWV und eid. dipl. Finanzplanigsexperte. Er isch sit einige Jahr im ene mittelgrosse Betrieb in Zug agstellt.
- De Andreas isch im Dorf Steihuse dur vili aktivi Mitgliedschafte bi verschidnige Verein bestens bekannt und verankeret.
- Agfange bi de Jungwacht, em Sportclub, später de Musiggesellschaft, de Guggemusig und Fasnachtsgesellschaft bis zu diverse ehreamtliche Tätigkeite isch ihm s'Mitmache am Dorfläbe immer wichtig gsi und au e Möglichkeit zum Ustusch vo Freud und Sorge mit de Bevölkerig.
- Scho gli häd er sich für d'Politik a'gfange interessiere, insbesonderi für d'Umfahrig im Gebiet Grindel, wo vor kurzem tatsächlich baut und eröffnet worde isch.
- Afangs 2000 wird er es aktivs Mitglied vo de CVP Steihuse, schafft bald im Vorstand vo de Ortspartei und später au im VS vo de Kantonalpartei mit.
- Uf de Gmeindsebeni isch er i verschiedene Arbeitsgruppe und Kommissionen ibunde worde, z.B. i de RPK und aktuell i de Finanzkommission. Er lanciert

diversi Vorstöss zu de Theme: Vereine fördern, früherer Schwimmunterricht, Schliessung des Dorfzentrums an der Fasnacht usw.

- Im Herbst 2006 häd ihn d'Steihuser Bevölkerig auf Ahieb in Kantonsrat gwählt und 2010 mit em beschte Resultat vo allne Kandidatinnen und Kandidate bestätigtet.

- Ab 2007 bis 2013 isch er Mitglied i de ständige Kommission Tüfbau, ebenfalls ab 2007 Mitglied i de Konkordatskommission, wo er dänn 2011 als min Nachfolger s'Präsidium übernoh hät.

- Ab 2008 isch au no d'Stawiko, **sicher sini Wunschkommission**, dezue cho.

- F'Fraktionsleitig häd er ab 2009 als Mitglied unterstützt und ab August 2012 amtet er als zueverlässige Chef vo de grösste Fraktion, wo's bestens verstahd, sini Kolleginnen und Kollege umsichtig z'führe und au überparteilich Allianze z'schmiede, wenn's für d'Sach nötig isch.

- Ebenso i sehr vilne ad-hoc Kommissionen isch d'Mitarbeit vom Andreas gfröget gsi. Ich verschone Sie vo de detaillierte Ufzählig.

- Schwerpunktmässig sind sie i de Berich Sicherheit, Finanze, Infrastruktur, Bildig/Witerbildig, Energie und Familie- und gsellschaftspolitische Theme agsidlet gsi.

- I de letschte 8 Jahr hed er über 20 persönlicher Vorstöss igreicht. D.h. mittels Motione, Interpellatione und kline Afrage hed er immer wieder Theme ufgriffe und im Regierigsrat gezielti Frage g'stellt und konkreti Ufträg erteilt.

- Sini fundierte Kännntnis und beharrlicher Art sind hüfig de Astoss, dass au mängisch unbeliebte Theme uf de Tisch chömmid, diskutiert und nach Lösige muess gsuecht wärde.

- De Andreas hed die klassicher politischer Laufbahn i'gschlage und Politik vo de Basis us kontinuierlich glehrt.

- Sis Wüsse und sini Interässe sind breit g'fächeret, alli politische Abläufe sind ihm bestens bekannt.

- Sini Nöchi und sis offni Ohr für d' Mitmänsche hälfid ihm debi, „d'Bodehaftig“ nid z'verlüüre.

- Er tued unheimlich gärn politisiere, hed en sehr höchi Dossierkänntnis und schafft strukturiert und isch guet organisiert.
- Er isch zielstrebig und falls nötig, chann er au durchus hartnäckig dra bliebe.
- Ich han mit em Andreas 4 Jahr im Kantonsrat zäme gschaffet und chan Ihne, liebe Delegierte, versichere, dass er kei Knochen-Arbeit schücht oder nur da a'zträffe isch, wo mer cha go Lorbeere abhole.
- Gschätzti Delegierti, d'CVP Steihuse empfiehl Ihne us voller Ueberzügig, de Andreas Husheer für d'Nationalratswahle z'nominiere. Wie Sie ghört händ, bringt er optimali Vorussetzige mit, de Kt. Zug in Bärn mit en ere bürgerliche Stimm z'verstärche.
- D' Steihuser CVP freut sich sehr, wenn de Andreas Husheer vo Ihne nominiert wird. Mir wärid riesig stolz, allefalls de **aller-erschi** Steihuser Nationalrat uf Bärn „chönne z'schicke“.
- Und zum Schluss: Selbstverständlich wünschid ihm au sini „drü Muettere“ nur s'Allerbeschti uf sim witere Wäg!

Härzliche Dank!